

Mirsad Hadžikadić:

Naše aktivnosti su se prebacile u Mostar. U subotu smo imali otvorenje predizborne kampanje u Mostaru. Ako se sjećaš, izbori u Mostaru će biti održani 20. decembra, tako da je od prošlog petka dozvoljeno vođenje predizborne kampanje. Mi smo svoje zvanično otvorenje kampanje održali u subotu. Bilo je zaista sjajno. Otišli smo u gradić Blagaj koji je odmah do Mostara i koji je jedna od izbornih jedinica u Mostaru, jugo-istočno, prema Sarajevu. Zapravo, oprostite, prema Dubrovniku, ne prema Sarajevu; jugoistočno od Mostara. Svaki put kad bih tu prolazio vozeći ka Neumu iz Mostara, posmatrao bih tu prelijepu tvrđavu na planini. Ona je noću uvijek osvijetljena i djeluje tako nadrealno, tako dostojanstveno. Oduvijek sam želio otići tamo. To je tvrđava gdje je herceg Stjepan Kosača živio i odakle je upravljao, odnosno gdje je imao rezidenciju, a on je jedno od velikih, značajnih imena u bosanskoj historiji. To je dakle u Hercegovini, čiji naziv i potječe od riječi *herceg*, što je titula - herceg Stjepan Kosača. Naši divni članovi Platforme za progres, kandidati i upravni odbor odnosno lokalni gradski odbor, organizovali su taj događaj upravo gore na toj tvrđavi. Do određenog mjesta se može voziti, a onda smo prošetali do vrha planine gdje se tvrđava nalazi. Bilo je prelijepo. Prvo je saslušana bosanska himna a zatim smo predstavili naše kandidate. Izložena je i ogromna zastava Platforme za progres. Ja sam održao kratki govor. Dron je fotografisao i snimao taj događaj, a na kraju smo otpjevali našu himnu. Bio je to prelijep događaj, kombinacija tradicije i potencijala za drugačiju budućnost. Bilo je zaista divno. Nakon toga smo sišli u grad u jedan restoran, gdje smo razgovarali o tom događaju i o kampanji za Mostar. Dakle, to je bilo prvo, zvanično predstavljanje naših kandidata, a cijeli događaj je emitovan i uživo na našoj Facebook stranici.

Narednog dana smo imali sjednicu našeg Predsjedništva odnosno Upravnog odbora Platforme za progres, uz lično prisustvo, u Mostaru. To je trajalo četiri sata, od 13:00 do 17:00. To je takođe bilo simbolično, jer smo odlučili da to uradimo u Mostaru, a uradivši to smo fokusirali našu pažnju i pažnju naših članova na Mostar. Nakon toga smo se vratili kući i imao sam prenos uživo na Facebooku koji i inače imam nedjeljom naveče. Interesantna stvar u svemu tome je da smo od tada imali mnoge sastanke vezane za Mostar. U srijedu smo takođe otišli u Mostar na jedan dan, da obilježimo Dan državnosti Bosne i Hercegovine, kojim se značaj daje 25-tom novembru tokom Drugog svjetskog rata u Mrkonjić Gradu, kad su postavljeni temelji državnosti Bosne i

Hercegovine unutar Jugoslavije, koja nije bila definisana ni kao hrvatska, ni kao srpska ni muslimanska, nego kao zemlja gdje će sve te etničke grupe i mnoge manjine pronaći sebe kao građane te države. Zato se svakog 25. novembra slavi taj dan. Mi smo to uradili u Mostaru u srijedu odnosno juče, tako što smo ispred gradske vijećnice u Mostaru održali pres konferenciju. Tu smo ponovo predstavili svoje kandidate. Predsjednik lokalnog gradskog odbora Platforme za progres je održao govor, kao i jedan od kandidata i ja. Govorili smo o značaju 25. novembra. Međutim, tog dana smo takođe proslavili drugu godišnjicu Platforme za progres, s obzirom da je naša osnivačka skupština održana 25. novembra 2018. godine. Taj događaj je zaista dobro organizovan.

Nakon toga smo otišli na vrh obližnje planine sa prelijepim pogledom na Mostar. Tu ima jedan restoran, i tu smo takođe izložili svoju zastavu koja je zaista ogromna. Bilo je prelijepo kad je dron sve to fotografisao i snimao, sa Mostarom u pozadini i sa nama na vrhu te planine dok razgovaramo o drugačijoj budućnosti Mostara i Bosne i Hercegovine.

Dakle, pripremamo se za te izbore. Imamo naše kandidate – 13 kandidata u Mostaru. Ono što je drugačije i interesantno u vezi Mostara je to da oni ne glasaju za svog gradonačelnika direktno, nego indirektno. Grad su podijelili u šest glasačkih područja odnosno izbornih jedinica. Tako ljudi iz nekog dijela grada glasaju samo za svoje kandidate za gradsko vijeće. Gradsko vijeće broji 35 članova, tako da ta različita gradska područja imaju po 3, 4 ili 5 predstavnika u gradskom vijeću. Oko četrnaest gradskih vijećnika, ja mislim, takođe dolaze sa liste za koju mogu glasati svi građani Mostara. Dakle, svaki građanin Mostara će imati dva glasačka listića: jedan sa kandidatima za svoj dio grada, i drugi sa kandidatima za cijeli grad. Na taj način su željeli u vijeću imati ljude koji predstavljaju njihov dio grada, ali takođe i one koji će razmišljati o gradu kao cjelini. Zatim one stranke koje dobiju većinu odnosno koje formiraju većinu u gradskom vijeću dobijaju pravo da izaberu gradonačelnika. Dakle, interesantno je.

To je grad koji je oduvijek bio veoma jako otvoren, kulturološki napredan, kreativan, ekonomski snažan, sa prelijepom klimom jer je jako blizu mora, sa prelijepim planinama koje ga okružuju, sa prelijepim mostom, prelijepom rijekom, sa ljudima koji su složno živjeli zajedno. Sada, nakon rata i tokom rata, postao je simbol mržnje i podjele. Grad ima zapadnu i istočnu obalu, i to je sada grad koji je poznat po dvije škole pod jednim krovom, gdje ide jedna smjena sa učenicima

Hrvatima, a druga sa učenicima Bošnjacima, i kojima nije dozvoljeno da se miješaju, što je jadno.

Planiramo često odlaziti u Mostar kako bismo našim lokalnim kandidatima pomogli sa kampanjom. Mi imamo svoju vlastitu listu. Mnoge koalicije su formirane, a neke stranke su odlučile da na izbore izađu samostalno. Mi smo odlučili da idemo samostalno pa ćemo vidjeti šta možemo učiniti i da li će ljudi u Mostaru prepoznati ovu novu političku snagu koja donosi promjene, ili će se vratiti starim podjelama duž etničkih odnosno religijskih linija. Interesantno je da su ovo prvi izbori u Mostaru nakon 12 godina. Dvanaest punih godina dvije ključne političke stranke se nisu mogle dogovoriti o tome kako da se izbori održavaju, prije svega, te ko će birati gradonačelnika. Pod pritiskom ostalih stranaka u Bosni i Hercegovini kao i međunarodne zajednice i sudskih odluka međunarodnih sudova, prema kojima je naređeno da u izvjesnom vremenu izbori budu održani, došli smo u poziciju da će izbori u Mostaru biti održani 20. decembra. Dakle, vidjet ćemo kako će se to odviti.

Mostar je važan zato što je uvijek bio izmiješan grad po pitanju etničkih i religijskih pripadnosti, veoma kosmopolitski, te je na mnoge načine predstavljao samu dušu Bosne i Hercegovine upravo jer je bio tako izmiješan i jer su se svi tako dobro slagali, tako da je ovo trenutno stanje Mostara pokazatelj stanja u Bosni i Hercegovini: podijeljenost, život u strahu i nefunkcionalnost. Svi se nadaju da bi upravo Mostar mogao biti prekretnica.

Imali smo neke pokazatelje da postoje vjetrovi promjene u Bosni i Hercegovini na izborima u Sarajevu i rezultatima izbora u Banjaluci, a bilo bi sjajno pa čak i bolje ako bi vjetrovi promjene stigli i u Mostar, ali to je do ljudi u Mostaru. Ja se samo nadam da neće doći do široko rasprostranjene prevare tog dana, te da će uspostavljeni mehanizmi zapravo zaštititi glasove građana.

Clark Curtis:

Kad je riječ o izborima u Mostaru, ima li ikakvog osjećaja kako bi kandidati Platforme mogli proći, ili je još uvijek prerano bilo šta reći?

Mirsad Hadžikadić:

Malo je prerano reći. Svjestan sam činjenice da su naši kandidati obično nepoznati. To su nove političke snage. To je ono što ljudi očekuju od nas – ljude koji nisu učestvovali u političkom procesu, koji nisu „uprljani“, kako kažu, članstvom u drugim strankama ili na njihovim listama. To je uglavnom i tačno za naše ljude. Ali, istovremeno glasači traže poznata lica. Dakle, oni u jednu ruku žele nešto novo, a u drugu ruku žele nešto poznato. Teško je balansirati ta dva suprotna zahtjeva. To mi u suštini kaže da je teško predvidjeti bilo šta. Takođe, ne znam da li će ljudi glasati duž etničkih linija, razmišljajući da su to njihovi ljudi koji će ih zaštititi, ili će pak zaista glasati za promjene. Preostaje da se to vidi. Na osnovu rezultata izbora 2020. godine odnosno ovogodišnjih lokalnih izbora, neko bi rekao da je razumno očekivati da će vladajuća stranka koja je teško poražena u Kantonu Sarajevo biti poražena i ovdje, ili barem da će njen uticaj donekle biti umanjen. Međutim, mi nemamo novca da uradimo naučno istraživanje javnog mišljenja kako bismo imali ikakav osjećaj o tome šta bismo mogli očekivati. Dakle, zaista nemam pojma. Bio bih sretan ako dobijemo svoje predstavnike u vijeću, bez obzira koliko mandata odnosno vijećnika/vijećnica. Samo da budemo tu. Jer, čak i jedan član bi bio važan za formiranje većine koja će onda definisati plan rada za sve događaje u gradu. Vidjet ćemo.

Clark Curtis:

Prošlo je skoro dvije sedmice od lokalnih izbora širom zemlje. Kakvo je opšte raspoloženje u Platformi, među kandidatima, kako onima koji su pobijedili tako i onima koji nisu? Jel se na sve to sada navikava i jel se ponovo dobija jasniji fokus o tome koja je misija?

Mirsad Hadžikadić:

To je odlično pitanje. Da, navikavamo se, ali dešava se još jedna stvar. Mnogi od kandidata koji su uspjeli postati gradski vijećnici i vijećnice sada uviđaju da nemaju iskustvo u ovim pitanjima i uviđaju da moraju mnogo da nauče o tome. U subotu ćemo na planinu Jahorinu iznad Sarajeva pozvati sve svoje članove gradskih vijeća i opštinskih vijeća, gdje ćemo razgovarati o tome koji su problemi i koji je budžet potreban za to, jer to će biti prva tačka na rasporedu mnogih gradskih vijeća. Takođe ćemo im reći kako da se ponašaju o ovoj klimi gdje članovi drugih stranaka koje su osvojile najviše glasova pa time i mjesta u gradskim vijećima sada razgovaraju sa ostalima,

uključujući naše predstavnike, i pitaju ih da pređu na njihovu stranu. Čak im nude velike svote novca i poslove ili bilo šta, kako bi te stranke odnosno broj njihovih delegata iznenada porastao i kako bi oni prešli liniju koja je potrebna za većinu, što bi značilo da bi oni kontrolisali budžet i kako se on troši. Naši članovi su pod ogromnim pritiskom. Mnogima od njih prilaze druge stranke, nudeći im da formiraju koaliciju s njima i tako formiraju većinu, pa nas oni pitaju kako da se ponašaju i kome da vjeruju a kome da ne vjeruju. Dakle, mnogo je toga o čemu se mora razgovarati po pitanju političkog iskustva i zrelosti. U tom smislu će biti jako interesantno vidjeti, pa ćemo čak i u subotu na Jahorini vidjeti kako će proći ta edukacija, tako da ih ohrabrimo i damo im okvir za razmišljanje. Oni svi traže da se sastanu sa mnom kako bi dobili neke upute o tome kako se ponašati i šta očekivati, te kako odgovoriti na sve te pritiske izvana.

Clark Curtis:

Novi primjer bolova odrastanja – nešto kroz što morate proći zbog uspjeha.

Mirsad Hadžikadić:

Rekao bih da je to sve više i više prepoznato kao uspjeh odnosno kao jedno od pozitivnih iznenađenja izbornog procesa. Naravno da smo željeli i više, ali mislim da je i ovo vrlo dobar rezultat.